

**Kabinet 2013: Pas Terengganu ucap tahniah kepada Najib
Utusan Online
16 May, 2013**

KUALA TERENGGANU 16 Mei - Pas Terengganu hari ini mengucapkan tahniah atas pembentukan Kabinet baharu oleh Perdana Menteri, Datuk Seri Najib Tun Razak semalam yang menyaksikan tiga wakil dari negeri ini dilantik sebagai menteri dan timbalan menteri.

Pesuruhjaya Pas negeri, Abdul Wahid Endut berharap mereka mampu memberikan khidmat dengan sebaik mungkin kepada rakyat khususnya di Terengganu.

Malah, jelasnya, daripada kalangan tiga yang dilantik itu, ada yang merupakan bekas menteri selain mempunyai pengalaman luas dalam politik dan kerajaan.

"Kita ucapkan tahniah kepada mereka, ada juga wakil dari Terengganu yang jadi menteri dan timbalan menteri.

"Kita juga berharap supaya mereka ini tak ada masalah memandangkan mereka adalah bekas menteri dan berpengalaman luas," katanya pada sidang akhbar di Ibu Pejabat Perhubungan Pas Terengganu di sini hari ini.

Abdul Wahid menambah, pihaknya juga mengharapkan agar pelantikan mereka berkenaan memberi lebih banyak manfaat kepada seluruh rakyat Terengganu kelak untuk menikmati kemudahan dan pembangunan yang lebih baik berbanding sebelumnya.

Dalam senarai barisan Kabinet baru yang diumumkan Perdana Menteri semalam, dua yang dilantik sebagai menteri penuh dan seorang sebagai timbalan menteri adalah dari Terengganu.

Mereka ialah Datuk Seri Idris Jusoh yang memegang jawatan sebagai Menteri Pelajaran dan Pengajian Tinggi 2 manakala Datuk Seri Ahmad Shabery Cheek sebagai Menteri Komunikasi dan Multimedia manakala jawatan timbalannya digalas oleh Datuk Jailani Johari. - UTUSAN ONLINE

Hakcipta Terpelihara © UTUSAN MELAYU (M) BERHAD

Source: http://www.utusan.com.my/utusan/Politik/20130516/po_21/Kabinet-2013-Pas-Terengganu-ucap-tahniah-kepada-Najib#ixzz2Zj8Id42X

© Utusan Melayu (M) Bhd